



19. marts 2010

Inatsisartut suleriaasianni § 36 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqut:

Atuartut asimiitinneqarnerini (lejrskole) angallat atorlugu nikilaarnissami, soorlu aalisariartitsinerini, angallatit ilaasoqarnissaminnut akuerisaasut kisimik atorneqaqqusaappaat, imaluunniit umiatsiaaqqat nalinginnaasut atorneqarsinnaappaat?

Atuartut nikisilaarlugit qaqqamut pisuttuartissagaanni angallassinissamik immikkut ilinniarnikut kisimik angallassinnaappaat, imaluunniit ilinniartitsisut atuartunik nakkutilliisut pisuttuartitsinissaminnut pisinnaatitaappaat?

Atuartut asimiitinneqarnerini piumasaaqatit allat suuppat? Imaluunniit inerteqqutit allat suuppat?

(Inatsisartuni ilaasortaq Karl Lyberth, Siumut)

Tunngavilersuut:

Ulluni kingullerni paasitinneqarpunga atuartut asimiitinneqartarnerinut tunngatillugu inatsisit sakkortoorujussuannorsimasut. Paasitinneqarnera malillugu ilaatigut piumasaaqaataalersimavoq atuartut angallammik nikissunneqassappata, soorlu aalisariartitsilluni, angallatit ilaasoqarnissaminnut akuerisaasut kisimik atorneqarsinnaalersimasut.

Isumaqaavippunga piumasaaqatit taamatut sakkortutigisut nunatsinni pissutsinut naleqqutinngitsut, aammalu malinneqarniarnerminni akisuallaarujussuartut, allaallu atuartut asimiitinneqartarnerisa allatut ajornartumik unitsinneqarnerinik kinguneqarsinnaasut.

Uanga nammineq eqqaamavara meeraallunga atuaqatikka ilagalugit atuarfiup aqqissugaanik asimiikkatta umiatsiaarannguaq atorlugu aalisariartarnerit qanoq nuannertigisut.

Piumasaaqaataalersimasut nutaat malinneqassappata atuartut asimiitinneqartarnerini siunertat ilaat katanneqassapput, atuartullu misigisassaasut puigunaatsuusartut aamma annaaneqassallutik.

Aammattaaq paasitinneqarpunga atuartut ungarvartillugit pisuttuartinneqassappata aamma piumasaaqaataalersimasooq angallassinissamik immikkut ilinniarsimasut kisimik atorneqarsinnaasut!

– Ilumut tamanna ilumoorpa?

Ilinniartitsisut atuartuutiminnik pisuttuartitsinnaajunnaarpalluunniit?

Paasisakka tupannarpallaaqimmata ilanngullugu paaserusunnarsilerpoq piumasaaqatit allat suuppammita? Assersuutigalugu ilinniartitsisut paarinnittut susinnaatitaappaat, imaluunniit susinnaatitaanngillat?